

Kalaallit Nunaat tamakkerlugu piffissami 17. – 19. juli 2021 killilersuigallernerit pillugit Namminersorlutik Oqartussat nalunaarutaat nr. 28, 16. juli 2021-mersooq Atuussimasoq (Historisk)

Nappaatit tunillaassortut akiorniarlugit iliuutsit pillugit Inatsisartut peqqussutaanni nr. 20, 12. november 2001-imeersumi, Inatsisartut inatsisaatigut nr. 1, 1. april 2020-meersutigut allangortinneqartumi §§ 6, 6 a aamma 12 a, 12 b kiisalu § 29, imm. 2 aamma 3 naapertorlugit uku aalajangersarneqarput:

Atuuffia

§ 1. Nalunaarut Kalaallit Nunaat tamakkerlugu atuuppoq.

Imm. 2. Nalunaarut Kalaallit Nunaanni Peqqinnissaqarfimmut imaluunniit nakorsiartarfinnut kiisalu nakorsiartarfinnut namminersortunut niuertarfinnilu peqqissaanermik naalagaaffimmit akuerisaallutik ingerlatani ingerlatsisunut atorfeqartitsiffiusunullu atuutinngilaq.

Imm. 3. Nalunaarut katersuunnernut, politikikkut allatulluunniit isummernissamik sunniiniarnissamik siunertalinnut atuutinngilaq.

Imm. 4. Nalunaarut eqqartuussivinnut atuutinngilaq.

Imm. 5. Nalunaarut mittarfinnut, tikittarfinnut/aallartarfinnut assigisaannullu atuutinngilaq.

Imm. 6. Nalunaarut ulluunerani neqeroorutininut namminersortunut pisortaniillu pigineqartunut, atuarfinnut, ilinniarfeqarfinnut il.il. atuutinngilaq, nappaatit tunillaassortut akiorniarlugit iliuutsit pillugit Inatsisartut peqqussutaanni § 22 takuuk.

Imm. 7. Nalunaarut angerlarsimaffimmi aqqissuussanut assigisaannullu atuutinngilaq.

Imm. 8. Nunatta nakorsaaneqarfia nalunaarummit immikkut ittumik akuersissuteqarsinnaavoq.

Illup iluani aqqissuussani il.il. peqataasinnaasut amerlassusaannik killilersuinerit

§ 2. Aqqissuussat, nalliuttorsiornerit, sammisaqartitsinerit assigisaalluunniit illup iluani ingerlanneqartussat minnerpaamik 20-nik peqataasoqassappat aqqissuussisoqaaqusaanngilaq.

Imm. 2. Oqaaseqatigiinnik siullernik eqqortitsinissaq aqqissuussisup akisussaaffigaa.

Aqqissuussani il.il. silami ingerlanneqartussani peqataasinnaasut amerlassusaannik killilersuinerit

§ 3. Aaqqissuussat, nalliuttorsiornerit, sammisaqartitsinerit assigisaalluunniit silami ingerlanneqartussat minnerpaamik 20-nik peqataasoqassappat aaqqissuussisoqaqqusaanngilaq.

Imm. 2. Oqaaseqatigiinnik siullernik eqqortitsinissaq aaqqissuussisup akisussaaffigaa.

Ininut kikkunnilluunniit iserfigineqarsinnaasunut piumasagaatit

§ 4. Inuussutissarsiummik ingerlatallit aamma suliffeqarfiit pisortanit pigineqartut ininik kikkunnit tamanit iserfigineqarsinnaasunik pigisallit piumasagaatit tullinnguuttut maleruassavaat:

1) Inini sulisut saniatigut inuit 20-it annerpaamik isersinnaapput. Ulluinnarni atortussanik niuertarfiit piumasagaammi uani ilaatinneqanngillat.

2) Inuit ininut qatserisartoqarfinni oqartussaasunit akuerineqarsimasunut isersinnaatitaasut amerlanerpaaffissaasa affaannaat isersimaqqusaapput, taamaattorli nr. 1 takuuk.

3) Inini qatserisartoqarfinni oqartussaasunit akuersissutitaqartinneqanngitsuni, natermi 4 m²-iusumi amerlanerpaamik inuk ataasiinnaaqqusaavoq. Nateq 4 m²-imik mikineruppat oqaaseqatigiit siulliit apeqqutaatinnagit inuup ataatsip isersimanissaa akuerineqarpoq. Nateq qanoq pequteqartiginera apeqqutaatinnagu iikkamiit iikkamut naatsorsorneqassaaq.

Imm. 2. Oqaaseqatigiinnik siullernik eqqortitsinissaq ininik akisussaasup akisussaaffigaa.

Pisortat angallassissutaanni amerlassutsinik killilersuineq

§ 5. Pisortat angallassissutaat, tassunga ilanngullugit bussit aamma taxat, issiaffiusinnaasut sinnerlugit ilaasoqaqqusaanngillat.

Imm. 2. Imm. 1-ip maleruarneqarnissaata qulakkeernissaa assartuummik piginnittup akisussaaffigaa.

Qanermut imaluunniit kiinnamut assiaquteqarnissamut piumasagaat

§ 6. Inuit aqqaneq-marlunnik sinnerlugillu ukiullit kiinnamut assiaquteqassapput:

1) inini kikkunnit tamanit iserfigineqarsinnaasuni isersimagunik, takuulli imm. 2-4.

2) assartuutini kikkunnit tamanit ilaaffigineqarsinnaasuni, tassunga ilanngullugit bussini taxanilu ilaagunik, takuulli imm. 2-4.

Imm. 2. Qanermut imaluunniit kiinnamut assiaquteqarnissamut piumasagaat ilisimassutsimik annikillimasunut, timikkut tarnikkulluunniit sanngiitsunut, allamilluunniit peqquteqarlutik qanermut kiinnamulluunniit assiaquteqarsinnaanngitsunut atuutinnngilaq.

Imm. 3. Qanorluunniit immikkoortuni 1-imi 2-miluunniit allaqqasoqaralarpat, peqqutissaqaralarpat qanermut kiinnamulluunniit assiaqutit ilaannakortumik tamakkiisumilluunniit peeqqaneqarallarsinnaapput, assersuutigalugu:

- 1) Piffissami sivikitsumi nerinermi imaluunniit imernermi.
- 2) Nakorsaatitornermi.
- 3) Qarngit aalaneratigut atuaasartumik oqaloqateqarnermi.
- 4) Qanermut kiinnamulluunniit assiaqutit anersaartorniarnermut ajoqutaagunik ipiannulersitsippataluunniit.
- 5) Politiit kinaassutsimik uppersaananeranni.

Imm. 4. Niuertarfiit – aamma kiffartuussiviit qanermut imaluunniit kiinnamut assiaqutitut taarsiullugu, sulisup aamma pisiniap akornanni plastikkimik assiaqusersinnaapput.

§ 7. Qanermut assiaqutit tassaapput qanermut qinngamullu assiaqutit ataasiartakkat imaluunniit annoraaminermik sanaat allunaasamik, tasisartumik assigisaanilluunniit siutitut imaluunniit niaqqup tunuatungaanut sukarutillit kiinnamullu attuumasut.

Imm. 2. Kiinnamut assiaqutitut tassaapput isinut, qinngamut qanermullu imaluunniit qinngamut qanermullu assiaqutit plastikimik sanaat kiinnamut attuumanngitsut.

Pineqaatissiissuteqartarneq

§ 8. §§ 2-5-imik unioqqutitsisoq pinerluttulerinermik inatsit malillugu pineqaatissinneqarsinnaavoq.

Imm. 2. Ingerlatseqatigiiffiit il.il. (inatsisilerinermi inuttut immikkoortutut isigineqartut) pinerluttulerinermik inatsimmi kapitali 5-imi malittarisassat malillugit pinerluttulerineq pillugu inatsiseqartitsinikkut akisussaatinneqarlutik pineqaatissinneqarsinnaapput.

Atuutilersitsineq aamma atuunneranut piffissaliussaq

§ 9. Nalunaarut ulloq 17. juli 2021 atuutilissaaq.

Imm. 2. Nalunaarut malillugu killilersuinerit, inerteqqutit, peqqussutit il.il. 19. juli 2021 ilanngullugu atuutissapput.

Namminersorlutik Oqartussat, ulloq 16. juli 2021

Kirsten Fencker
Peqqinnissamut Naalackersuisoq

/ Aka Olesen